

Ilisimatusarfimmi uumassulilerinermi SILA bachelorinnngorniarfik sulisussamik/AC-fuldmægtigimik pissarsiorpoq

Ilisimatusarfimmi ilinniartitaanermi nutaami uumassulilerinermi SILA bachelorinnngorniarfimmi qanimut suleqatigiinni annertuumik soqutiginnittuni suleqataalernissaq kajungeraajuk?

Ilisimatusarfimmi Peqqissaanermik Pinngortitamillu Ilisimatusarfimmi ilinniartitaanermi nutaami, uumassulilerinermi SILA bachelorinnngorniarfimmi sulisussamik/AC-fuldmægtigimik juulip ulluisa aallaqqaataanni- immikkulluunniit isumaqatigiissuteqarnikkut- sulilersussamik pissarsiorpugut. Atorfik ukiunut marlunnut killiligaavoq.

Februaari qaammat 2025 uumassulilerinermi SILA bachelorinnngorniarfimmi ilinniartut holdit suilliit aallartipput. Ilinniartitaanermi ullumikkut uumasulilerisut atorfeqavissut sisamaapput ilinniartullu aqqaneq marluullutik.

Peqqissaanermik Pinngortitamillu Ilisimatusarfimmi, uumassulilerinermi SILA bachelorinnngorniarfimmi nunatsinni pinngortitamik ilisimatusarnermi ilinniartitaanerit siullersaanni, suleqatigiinnut tunniusimasunut ilanngugit. Sulinermi ilinniarnermilu avatangiisit iluarinartut, kajuminnartut pissanganartullu ukkataragut, illup iluani silamilu periarfissiisunik assigiinngitsorpassuarnik suliassartalimmik atorfeqalissaatit.

Ukiut, ilinniagaq suaassuserlu apeqquaatinnagit qinnuteqartoqarnissaa kissaatigarput.

Suliassat tamaasa qinnuteqartup suliarisinnaasariaqanngikkai maluginiaqquneqarpoq – assersuutaannaapput.

Qinnuteqartut, piginnasat allaffissornikkut nalinginnaasumillu suliassat akuleriit naapertuuttut qitiutillugit qinnuteqarsinnaapput, imal. arlaalt pingartinnerusinnaallugu. Piffissap ilaannaa sulisinnaaneq isumaqatigiinniutaasinnaavortaaq.

Allaffissornikkut suliassat pingaarnersiornagit ilaatigut makkuupput:

- Sila bachelorinnngorniarnermut tunngatillugu avammut ilutsinnilu attaveqatigiinneq.
- Pikkorissaanissamik pilersaaruserneq ataqatigiissaarinerlu.
- Lektorit avataaneersut angalanissaannik, ineqarnissaannik il.il. ataqatigiissaarineq.
- Lektorinut avataaneersunut – aalisartunullu piniartunullu attaveqarneq.
- Ininik, angallatinik atorussanillu allanik inniminniineq.
- Aningaasaateqarfinnut qinnuteqarneq.
- Ilinniartitaanermik nittarsaassineq.
- Aningaasartuutissatut missingersuutininik nakkutilliineq.

Suliassat nalinginnaasut pingaarnersiornagit ilaatigut makkuupput:

- Najuulluni sulinermi tamatumunngalu atatillugu piniagassanik piniarnissani pilersaaruserneq peqataanerlu.
- Laboratoriami sungiusarnissani pilersaaruserneq ikiunnerlu.
- Ininik ilinniartitsivissamik piareersaneq.
- Asimi suliffimmi laboratoriamilu atorunik peqqumaateqarneq aserfallatsaaliinerlu.
- Pisiniarneq.
- Teknikki qarasaasiornerlu
- Ulluinnarni SILA immikkoortortami ilinniagaqassutsikkut siunersioqatigiinnerni, ilorrisimaaqatigiinnerni, ilinniartitsinerni, angalanerni, ataqatigiissaarinnerni, ataatsimeersuarnerni assigisaannilu peqataaneq
- Ilinniartitsinissanut piareersarnermi- ass. atorussanik naqiterinnut atatillugu- suliassat takkussuuttut.

Qinnuteqartunit naatsorsuutigisat:

- Nunatsinnik, nunatsinni inuiaqatigiinnik pinngortitamillu ilisimaarinnilluarneq.
- Attaveqatigiinnerni nittarsaassinernilu kulturit assigiinnginnerannik ataqqinninissap pingaaruteqarneranik paasinnittuuneq.
- Angalanernut atatillugu pilersaarusernermik ataqatigiissaarinnermillu misilittagaqarneq.
- Attaveqatigiinnermut, ataqatigiissaarinnermut aningaasaqarnermullu tunngasunut piginnaaneqarneq.
- Pinngortitamik ilisimatusarnermi ilinniartitaanermi kalaallisut periutsimik immikkuullarissamik inersaarussuseqarneq, nunatsinni periarfissanik nukittoqutinillu, ilinniartitaanermik iluatsilluartumik, kalaallinut ilinniartunut nunatsinnilu suliffeqarfinnut naleqqussakkamik pilersitseqataasinnaasunik takunnissinnaaneq.
- Peqqissaanermik Pinngortitamillu Ilisimatusarfimmi SILA bachelorinnngorniarnermut immikkoortortami sulinermi ilinniarnermilu ileqqunik peqqinnartunik pilersitseqataanissamut piumassuseqarneq.
- Nunatsinni najuulluni sulinermik piniarnermillu misilittagaqarneq iluaqutaassaaq.

Uagut:

Suleqatigiuvugut tunniusimalluartut, sulinermi ilinniarnermilu avatangiisinik assigiinngissutsinik paasinnilluarfiusunik tamanullu inissaqartitsisunik, iluarinartunik kajungernartunillu pilersitsinissamik kissaateqartut.

SILA immikkoortortami sulisut ullumikkut tassaapput; immikkoortortami pisortaq Aviâja Lyberth Hauptmann, studieadjunkti Liv Mejer Larsen, studieadjunkti Michael Rosing ilisimatoorlu Morten Meldgaard kiisalu ilinniartut ph.d.-nngorniallu.

Neqeroorutigisinnaavagut:

- Sullivimmi avatangiisit pitsaasut, sulisut ilinniartullu iluarisimaarinninnissaannik ukkassiviusut.
- Suleqatit kajumissusillit, qanimut suleqatigiit siunersioqatigiinnissamut tapersersuinissamullu periarfissiisut.
- Suliffik sunniuteqarnissamut annertuumik periarfissalik.
- Atorfik tamatigoortoq piginnaasanut naleqqussarneqarsinnaasoq

Qinnuteqaat.

Qinnuteqaatip saniatigut makku ilanngunneqassapput:

Ilanngussaq 1: *Curriculum Vitae*

Ilanngussaq 2: Ilinniagarisimasinnaasanut uppersaatait

Ilanngussaq 3: Ilanngussinnaasat allat

Qinnuteqarfissaq kingulleq tassaavoq **majip 25-ni 2025 nal. 12:00**, qinnuteqaallu uunga nassiunneqarsinnaavoq personale@uni.gl

Attavissaq/paasissutissat:

Atorfik pillugu sukumiinerusunik paasisaqarusukkuit, immikkoortortami pisortaq Aviâja Lyberth Hauptmann ph.d. attaviginissaanut tikilluaqqusaavutit oqarasuaammut uunga +299 385600 / +299 34 73 33.

Ilisimatusarfik, Peqqissaanermik Pinngortitamillu Ilisimatusarfik uumassusilerinermilu SILA bachelorinngorniarfik uani: www.uni.gl annertunerusunik paasisassarsiorfigisinnaavatit.

Ilisimatusarfik pillugu

Ilisimatusarfik 1987-imi pilersinneqarpoq. Maannakuugallartoq ilinniarneqarsinnaasut assigiinngitsut aqqaneq marluupput, taamatuttaaq Ilisimatusarfiup neqeroorutigai diplom-imut masterimullu saniatigut ilinniarnertit. Ilisimatusarfik issittumi universitetiuvoq nunarsuup ilaani pilertortumik ineriartorfiusumi nutaanik ilisimasaqalerfiusoq nutaallorfiusorlu. Siulersuisut tassaapput Ilisimatusarfiup qullersai. Ulluinnarni aqutsineq rektorimit direktørimillu ingerlanneqarpoq. Instituttit sisamaasut Instituttini Siunnersuisoqatigiinnit siunnersorneqartumik siulersorneqarput.

Ilisimatusarfik sisamanik instituteqarpoq:

- *Ilinniartitsinermik Ilisimatusarfik*
- *Inuiaqatigiilerinermik, Aningaasaqarnermik Tusagassiornermillu Ilisimatusarfik*
- *Kulturimik, Oqaatsinik Oqaluttuarisaanermillu Ilisimatusarfik*
- *Peqqissaanermik Pinngortitamillu Ilisimatusarfik*

Allaffissornikkut aqutsisoqatigiiffik pillugu

Allaffissornikkut aqutsisoqatigiiffiup ilisimatusarfik tamakkerlugu sullitaraa. Ilisimatusarfiup direktørianit aqunneqarpoq. Allaffissornikkut aqutsisoqatigiiffik ilinniartissuarmi ilimmarfimmilu immikkoortortaqqarpoq. Immikkoortortat faginik ingerlatsiviusunik qanimut suleqateqartarput soorlu namminneq akunnerminni aamma taamaattartut. Allaffissornikkut aqutsisoqatigiiffimmi suliaasat tassaapput: ilinniartut pillugit-, sulisut pillugit aqutsineq, Siulersuisuniik, Akademisk Rådimit kiisalu ilimmarfimmi sulisunik ilinniartunillu sullisineq. Allaffissornikkut aqutsisoqatigiiffiup ilimmarfiup ilutaanik sanaartornermik nakkutiginninneq aamma ingerlataraa.

Aningaasarsiatigut atorfinitsitaanermilu atugassarititaasut

Akissarsiat atorfininnermilu atugassarititaasut, tassunga ilanngullugit atorfinitsitaanermi soraarnermilu angalanissamut akiliunneqarnissamut pisattallu nassiunneqarnerannut Kalaallit Nunaanni Namminersorlutik Oqartussat kattuffiullu isumaqatiginniarsinnaatitaasup attuumassuteqarfigisap akornanni isumaqatigiissutaasut atorfininnerup nalaani atuuttut naapertorlugit ingerlanneqassapput.

Najugaq

Atorfimmut atatillugu sulisunut inissiamik innersuussisoqarsinnaanngilaq. Qinnuteqartoq Namminersorlutik

Oqartussani atorfeqarnermini sulisutut ineqartinneqareersimaguni sulisutut ineqarsinnaatitaanini tigummiinnarsinnaavaa. Atorfimmut atatillugu ini atorfeqarnermut tunngavoq, taamaalilluni atorfeqarnerup unitsinnerani qimanneqassalluni.